



**GOVERNUN KONSTITUSIONÁL BA DA-IV
SEKRETARIA ESTADU KONSELLU MINISTRUS**

KOMUNIKADU IMPRENSA

Sorumutu Konsellu Ministrus 9 Feveiru 2011

Konsellu Ministrus hala'o sorumutu iha Kuarta, loron 9 fulan Feveiru tinan 2011, iha Sala Sorumutu Konsellu Ministrus nian, iha Palásiu Governu, iha Díli no aprova tiha ona:

1. Planu Asaun atu harí Banku Nasionál Investimentu no Dezenvolvimentu Timor-Leste nian

Konsellu Ministrus aprova tiha ona Planu Asaun atu, iha fulan hirak oin mai, harii Banku Nasionál Dezenvolvimentu. Planu asaun ida ne'e, mosu hafoin hala'o servisu hirak atu harii instituisaun ida ne'e, objektivu ida ne'ebé uluk kedas mosu ona iha programa Governu Konstitusionál nian ba Dahaat, ne'ebé hakerek dehan Banku Nasionál Dezenvolvimentu sei sai nu'udar "instrumentu finanseiru ida atu apoia Modelu Dezenvolvimentu Ekonómiku Sustentadu Timor-Leste nian ida, ne'ebé mak ninia maioria kapital ne'e, públiku".

2. Rezolusaun ne'ebé aprova konsesaun rai ba konstrusaun Ospital Hope

Hatan ona atu fo arendamentu, prazu naruk, ba antigu Ospital Portugés nian (ne'ebé mós ema koñese ho naran Dr. António Carvalho), iha Lahane, atu harii Ospital Hope (HOH) Timor-Leste nian.

Planeia tiha ona la'ós de'it servisu hirak saúde nian, ne'ebé mak sei hahú hala'o ba dahuluk husi profisionál sira Austrália nian no paíz hirak seluk, maibé mós projetu ne'e ninia objetivu atu promove formasaun profisionál ba Timor oan sira, atu sira bele hala'o jestaun HOH nian no fo providénsia liu hosi servisu klíniku hirak ne'ebé mak tenke hala'o.

Konsellu Ministrus analiza tiha ona mos:

1. Projetu Dekretu-Lei ne'ebé aprova Institutu Nasionál Formasaun Kontinua no Aperfeisoamentu Profisionál Saúde nian (INFCAPS)

Projetu ida ne'e hakarak atu transforma Institutu Siénsia Saúde (ICS) iha Institutu Nasionál Formasaun Kontinua no Aperfeisoamentu ba Profisionál Saúde sira, ne'ebé hetan vokasaun ba formasaun hanesan profisionál ba saúde

nian, nune'e formasaun baze nian fó ba iha estabesimentu ensinu nian ne'ebé hetan vokasaun atu hala'o servisu ida ne'e.

Atu hanoin de'it katak, ICS, ne'ebé harii iha tinan 2005 nian, nu'udar Servisu personalizadu husi Ministériu Saúde ho ninia misaun atu hala'o formasaun kontínua no ensinu superiór tékniku ne'ebé la'ós universitáriu profisionál saúde nian sira. Aprovasaun Estatutu UNTL nian, iha tinan 2010, determina tiha ona katak ICS sei muda hodi bele integra kursu hirak ho nível universidade nian iha UNTL.

Entretantu Ministériu Saúde, koalia ona kona-ba nesesidade formasaun kontínua ba ninia ema profisionál saúde nian, atu bele garante hodi hasa'e prestasaun ba kuidadu sira, bainhira atende nesesidade sira ne'ebé estratéjiku ba dezvoltimentu sektór prazu médiu no prazu naruk, tanba ne'e mak prezisa apresenta proposta transformasaun nian ida ne'e, hodi ICS bele sai fali INFCAPS.

2. Projeitu Dekretu-Lei kona-ba Estrutura Orgánika Ministériu Turizmu, Komérsiu no Indústria (MTCI) nian

Besik tinan rua hafoin aprova tiha Dekretu-Lei n.º 7/2007, 4 Juñu – ne'ebé mak estabese Orgánika MTCI nian, hafoin hakerek tiha Estrutura Orgánika Governu Konstitusionál ba Dahaat no tuir kondisaun ekonómika no sosiál hirak iha tempu ne'ebá – hakarak atu ajusta estrutura organizasaun ministériu ninian ba realidade foun paíz ne'e nian. To'o oras ne'e iha duni dezvoltimentu maka'as iha komérsiu esternu no doméstiku ne'ebé, hanesan iha turizmu, la'o maka'as liu to'o datolu. Índise hirak kona-ba indústria kí'ik no médiu ninian, liu-liu ligadu ho konstrusaun sivil sai pozitivu duni.

Nune'e, mak jestaun rekursu umanu no materiál nian sira ne'ebé mosu hosi responsabilidade hirak foun iha abastesimentu públiku nian iha paíz ida ne'e no atu reorganiza fali lojístika, buat rua ne'e hatudu nesesidade atu reorganiza fali servisu sira no adapta hikas fali estrutura MTCI nian.